

Da Zwetschnbam

Dieter Prietsch

Letzts Johr hob i mein Zwetschnbam im Gartn obgschnin.
Viazg Jahr is a hintam Haus gstandn.
Drogn hod er eh nia gscheid. Is ned schod drum.
A hoibads Johr hod a ma an Schodn gmocht,
wenn i d' Sunn so notwende braucht hät.
An Haufa Bladl hod a gwoafa im Hiagst.
Da ganz Weia war voi Dreg.
Koan Fisch hod ma mer gseng.
Jeds Johr hob i d' Schorrinn vo seine Bladl ausrama miassn.
D' Vögl ham vom Bam oba af Gmiasbetl gschißn.
D' Schwigamuatta war scho ganz sire.
Af de bor Zwetschn, de jeds Johr obagfoin san, bin i ausgrutscht.
D' Wepsn sand oglockt woan und hom danoch d' Kinda plogt.
Wenn a wirkle a moi drogn hod,
hod a seine Zwetschn af de gleanstn Zweigal vadoid,
af de ma nia hi kemma is.
De lang Loadda hob i vo da Schupfa hoin miassn.
Vom Bam obagfoin war i a a bor moi.
Unterm Johr san eam a bor Ast obbrocha,
wenns a weng an Wind ghabt hod.
Da Nachba hod scho Angst um sein Wintagoatn ghobt.
Etz liegt a hint am Hoizblotz hinta da Garage,
da Zwetschnbam, net da Nachba.
Hinteschloapft hob i eam ganz aloa.
Do is ma gscheid woam woan.
Zsamgschnin hob in nacha af lauta gwandte Stückl.
Do hod er ma scho's zwoate moi woam gmocht.
Nacha hob in herkloim miassn af mein Hackstog.
Des war dann 's dritte moi, dass a mi zum Schwitzn brocht hot.
Etz muas i eam mim Hoizkoa ind Stubn einadrogn.
Dea hod a mords Gwicht.
Awa oans muas ma eam lassn, a schene Hitz macht a im Kachlofa.
Des erste moi, dass a ma a Freid mocht.

